

Esta mañá celebrouse na casa do concello de Verín un pleno extraordinario no que se aprobou a contratación dunha operación de crédito a curto prazo por un valor de 2.600.000 euros, adxudicada a entidade bancaria Caixa Rural Zamora.

Ao finalizar a sesión, Gerardo Seoane, alcalde; Diego Lourenzo, tenente de alcalde; e Rosario Rodríguez, concelleira de Recursos Humanos e Réxime Interior, aproveitaron para adiantar aos medios presentes algúns dos proxectos nos que se atopa traballando actualmente o grupo de goberno e que serán eixos centrais do final da lexislatura; como son a remunicipalización do servizo de augas, a adquisición do edificio histórico dos Almacéns Recaredo, a cesión dos terreos á Fundación San Rosendo para a construción do complexo balneario e asistencial e o PERTE de dixitalización do ciclo da auga.

No que se refire a operación de Crédito a curto prazo aprobada no pleno, o alcalde de Verín, Gerardo Seoane, explicou que «posibilitará a activación dos pagos das facturas pendentes desde o ano 2021 ata o segundo trimestre do 2022».

Segundo se confirmou na rolda de prensa, un dos proxectos que verán a luz nas próximas semanas é a remunicipalización do Servizo Municipal de Augas e Saneamento. O rexedor municipal anunciou que se someterá a votación no próximo pleno a aprobación da recuperación de devandito servizo (que actualmente se atopa xestionado indirectamente pola empresa Espina y Delfín); pasando de ser, no caso de ratificarse, de xestión directa municipal. «Isto supoñerá para o usuario un aforro final na súa factura da auga dun 20 por cento», concretou o alcalde de Verín.

«Un dos obxectivos do actual goberno municipal». recalcou o tenente de alcalde, «foi, desde o seu inicio e por compromiso electoral, a remunicipalización eficiente dos servizos públicos locais e a súa modernización en aras do beneficio económico e servizo ao cidadán. Estamos a

demostrar con feitos que unha vez que a xestión directa volve o Concello supón un aforro real para a cidadanía, ademais de mellorar o servizo».

Tamén no próximo pleno someterase a votación a cesión final dos terreos necesarios para a construción comprometida pola Fundación San Rosendo do seu complexo balneario e asistencial. «Isto é unha clara aposta do grupo de goberno pola creación dun centenar de novos postos de traballos directos que sen dúbida repercutirá no benestar e crecemento da nosa vila», salientou Seoane.

Pola outra banda, o Concello adquirirá o “emblemático” edificio dos almacéns Recaredo Romero, obra do arquitecto Daniel Vázquez Gulías. «Isto será posible», matizou Seoane, «grazas a un préstamo de 890.000 euros -a un cero por cento de interese- concedido pola Xunta de Galicia dentro do seu programa de rehabilitación. «Este préstamo devolverase nun prazo de oito anos, abonando 110.000 euros por ano.»

Por último, dende o grupo de goberno informaron que o Concello de Verín, os concellos da comarca e os de A Mezquita e A Gudiña, uniranse para traballar nun plan especial Estratéxico para a Recuperación e Transformación Económica do Ciclo da auga no que a través da Dixitalización impulsarase o uso das novas tecnoloxías da información neste ciclo, o que permitirá mellorar a súa xestión e a limpeza, aumentar a súa eficiencia, mellorar a limpeza das augas, reducir as perdas na redes de subministración e avanzar no cumprimento dos obxectivos ambientais marcados pola planificación hidrolóxica e as normativas internacionais.